

Scolarisaziun cun sustegn

Betg tut ils uffants na sa sviluppan tuttina spert, e quai è dal tuttatafatg normal. I dat uffants ch'èn anc dependents d'in tschert sustegn per in cumenzament da scola cun success. Per els datti tut tenor vischnanca ina da las suandantas pussaivladads:

- ❖ **Classe d'introducziun (CI):** La materia da scola da la 1. classe vegn repartì sin 2 onns, suenter vegni decidì da nov co che la carriera da scola da l'uffant va vinavant.
- ❖ **Classe pitschna integrada (CPI):** Ils uffants frequentan ina instrucziun da promoziun en ils roms tudestg e / u matematica, ils ulteriurs roms vegnan dats en la classe regulara. Las finamiras d'instrucziun pon vegnir adattadas als uffants. En la CPI vegnan ils uffants promovids en gruppas pitschnas.
- ❖ **Promoziun integrada (PI):** Ils uffants entran en la 1. classe regulara cun il sustegn d'ina pedagoga curativa da scola. Quella guida l'uffant per insaquantas uras en tudestg ed en matematica ubain ch'ella elavura differents temas en gruppas pitschnas.

Entrada anticipada en scola

En intgins cas èsi raschunaivel da scolarisar l'uffant anticipadamain gia suenter in onn scolina. Per quai ston els esser sviluppads uschè lunsch en uschè blers secturs sco pussaivel da la prontadad da scola, ch'els san en il mintgadi da scola star bain a pèr cun uffants ch'èn fin in onn pli vegls.

Da noss scleriment resulta in maletg che mussa, sche l'uffant posseda in avantatg da svilup e sch'el vegn ad esser a l'autozza da las pretensiuns da scola.

Per ina scolarisaziun anticipada dovri ina recumandaziun dal servetsch psicologic da scola al cussegl da scola.

Terz onn scolina

In terz onn scolina po esser raschunaivel, sch'ins suppona che l'uffant madiria anc en ses svilup.

Da la scolina en scola



Per in cumenzament da scola cun success

Servetsch psicologic da scola dal chantun Grischun


Uffizi per la scola populara ed il sport
www.avs.gr.ch

Stimads geniturs!

L'entrada en scola è ina midada impurtanta en la vita da l'uffant e da sia famiglia. En blers cas è in uffant suenter il 2. onn scolina pront per quella midada e s'allegra sin l'entrada en scola.

La prontadad d'emprender per la scola sa sviluppa automaticamain enturn la vegliadetgna da 7 onns. I po dentant er esser che Vus sco geniturs u er la persuna d'instrucziun da scolina avais anc dumondas avertas areguard la prontadad da scola da l'uffant. En quest cas pudais Vus As infurmar ed As laschar cussegljar tar il post regional da cussegliaziun da scola e d'educaziun, per che Vus possias decider cun responsabladad davart la scolarisaziun da Voss uffant.

Nus lain che Voss uffant possia cumenzar la scola senza quitads e possia emprender senza tensiun e tema.



Tge characterisescha la prontadad da scola?

Davart la prontadad da scola na decida betg mo in indizi. Suandants secturs vegnan integrads en il giudicament da la prontadad da scola:

- ❖ **Svilup cognitiv:** Sa l'uffant s'exprimer en moda chapaivla? Sa el tegnair endament e reproducir chanzuns, versets ed istorgias? Co tracta el masas e dumbers?
- ❖ **Svilup corporal:** Sa l'uffant controllar, diriger e coordinar ses moviments? Co dovra el colurs e forsch?
- ❖ **Cumportament social:** Co sa cumporta l'uffant en ina gruppa? Co schlia el conflicts? Co concepescha el ses contacts?
- ❖ **Svilup emoziunal:** È l'uffant independent, sa el sa statgar da la chasa dals geniturs? Ha l'uffant confidenza en las atgnas abilitads?
- ❖ **Cumportament d'emprender e da lavurar:** Ha l'uffant interess vi da l'urden da scola? Mussa el ina tscherta perseveranza tar occupaziuns datiers a la scola?

Tge fa il servetsch psicologic da scola?

Il servetsch psicologic è in post spezialisà independent, che cusseglia ils geniturs tranter auter er tar dumondas da la scolarisaziun. Las cussegliastras ed ils cusseglia-ders da scola e d'educaziun han enconuschentschas areguard il svilup ed areguard la promoziun uffantila sco er areguard las pretensiuns che vegnan tschentadas als uffants tar l'entrada en scola.

Nus faschain differents pensums cun Voss uffant che ans pussibiliteschan da constatar sias fermezzas e sias difficultads, sias abilitads linguisticas e sia chapientscha da dumbers, sias prestaziuns da memoria, ses cumportament da lavurar e.u.v.

Sper quests resultats integrain nus en nossa cussegliaziun sa chapescha er las observaziuns ed ils puncts da vista da Vus, da la persuna d'instrucziun da la scolina ed eventualmain er d'autras persunas da referiment. Sin fundament da questa survista As sustegnain ed As accompagnain nus tar Voss process da decisiun.

En cunvegnientscha cun Vus po il servetsch psicologic da scola far – en cas da basegn – ina dumonda da scolarisaziun correspundenta al cussegl da scola.